

বৈদেশিক মুদ্রা নীতি বিভাগ

বাংলাদেশ ব্যাংক

প্রধান কার্যালয়,

ঢাকা।

www.bangladeshbank.org.bd

এফ.ই. সার্কুলার নং - ০৩

তারিখ: ১৭ এপ্রিল, ২০০৮
০৪ বৈশাখ, ১৪১৫

বৈদেশিক মুদ্রা লেনদেনকারী
সকল অনুমোদিত ডিলার এবং
লাইসেন্সধারী মানিচেঞ্জার।

প্রিয় মহোদয়গণ,

বাংলাদেশে আগত বিদেশী পর্যটক/অনিবাসী বাংলাদেশী নাগরিকগণ কর্তৃক টাকায় রূপান্তরিত
বৈদেশিক মুদ্রার অব্যয়িত অংশ বিদেশে প্রত্যাবর্তনকালে পুনরুপান্তরকরণ প্রসংগে।

উপর্যুক্ত বিষয়ে Guidelines for Foreign Exchange Transactions (GFET), 1996 (Vol-1) এর অধ্যায় ১৯
এর ৯ নং অনুচ্ছেদ এবং এফ.ই. সার্কুলার নং ২১, তারিখ ২০/০৮/২০০১ এ প্রদত্ত নির্দেশনার প্রতি আপনাদের দৃষ্টি আকর্ষণ
করা যাচ্ছে।

০২। GFET এর উপর্যুক্ত নির্দেশনাবলে বাংলাদেশে স্বল্প-সময়ের জন্য আগত বিদেশী পর্যটকগণ (বাংলাদেশে চাকুরীর
উদ্দেশ্যে আগত বিদেশী নাগরিকগণ ব্যতীত) বাংলাদেশে আগমনের পর তাদের বৈদেশিক মুদ্রা টাকায় রূপান্তর/ভাংগানোর পর
অব্যয়িত টাকার অংশ বৈদেশিক মুদ্রায় পুনরুপান্তর করতে পারেন। উল্লেখ্য, রূপান্তরের সপক্ষে সংশ্লিষ্ট অনুমোদিত ডিলার প্রদত্ত
মূল encashment certificate প্রদর্শন সাপেক্ষে শুধুমাত্র রূপান্তরকারী অনুমোদিত ডিলার ব্যাংকই পুনরুপান্তর সুবিধা প্রদান
করতে পারে। পাশাপাশি, এফ.ই. সার্কুলার নং-২১, তারিখ ২০/০৮/২০০১ এর নির্দেশনামতে, বাংলাদেশ ব্যাংকের লাইসেন্সপ্রাপ্ত
কোন মানি চেঞ্জার তার ইস্যুকৃত মূল encashment certificate এর বিপরীতে মাথাপিছু অনধিক মার্কিন ডলার ৫০০/-
(পাঁচশত) বা সমপরিমাণ অন্য বৈদেশিক মুদ্রায় পুনরুপান্তর সুবিধা প্রদান করতে পারে।

০৩। এ মর্মে সিদ্ধান্ত গৃহীত হয়েছে যে, আন্তর্জাতিক বিমানবন্দরের বহির্গমন লাউঞ্জে অবস্থিত ব্যাংকের বুথে বাংলাদেশে
স্বল্প-সময়ের জন্য আগমনকারী বিদেশী পর্যটক এবং অনিবাসী প্রবাসী বাংলাদেশীরা তাদের অব্যয়িত টাকা সর্বোচ্চ মার্কিন ডলার
১০০/- (একশত) বা সমপরিমাণ অন্য বৈদেশিক মুদ্রায় যে কোন অনুমোদিত ডিলার বা বাংলাদেশ ব্যাংকের লাইসেন্সধারী
মানিচেঞ্জারের ইস্যুকৃত encashment certificate প্রদর্শনপূর্বক পুনরুপান্তর করতে পারবেন। এ পুনরুপান্তরকালে ব্যাংক
নিম্নোক্ত কাগজপত্রাদি/তথ্যাদি সংরক্ষণ করবে :

(ক) ইতিপূর্বে রূপান্তরের বিপরীতে ইস্যুকৃত মূল encashment certificate অথবা রূপান্তরকারী ব্যাংক/মানি চেঞ্জার
কর্তৃক সত্যায়িত চিত্রলিপি;

(খ) সংশ্লিষ্ট যাত্রীর বোর্ডিং কার্ডের চিত্রলিপি যার বিপরীত পৃষ্ঠায় যাত্রীর পাসপোর্ট নম্বর ও ইস্যুর তারিখ, জাতীয়তা,
পুনরুপান্তরিত বৈদেশিক মুদ্রার পরিমাণ লিপিবদ্ধ করতে হবে।

০৪। পুনরুপান্তর বিষয়ে উপর্যুক্ত অনুচ্ছেদ ২ এ উল্লিখিত সুবিধাদি যথারীতি বহাল থাকবে এবং অনুচ্ছেদ ৩ এ
উল্লিখিত সুবিধা পুনরুপান্তর বিষয়ক বিদ্যমান সুবিধাদির অতিরিক্ত হিসেবে বিবেচিত হবে।

এ নির্দেশনা অবিলম্বে কার্যকর হবে। সংশ্লিষ্ট সকলকে এ মর্মে অবহিত করবেন এবং অনুগ্রহপূর্বক প্রাপ্তি স্বীকার
করবেন।

আপনাদের বিশ্বস্ত,

(আহমেদ এহতেশামুল হায়দার)

উপ-মহাব্যবস্থাপক

ফোন : ৭১২০৩৭৫।